

**NAQQIUT**

Allaffissornikkut akissuteqaammut naqqiissut  
ullormi 10. maj 2012-imeersumut  
inatsisartut allaffeqarfianut tunniussamut.

**Sunnigiffimmi piniarnermut allagartalinnut tuttunik umimmannillu pisassiinermi immikkut akiliuteqartitsisoqartalissanersoq pillugu apeqquteqaat aallaavigalugu oqallinnissamik siunnersuut.**

(Inatsisartunut ilaasortaq Storm Ludvigsen, Inuit Ataqatigiit)

**Akissuteqaat**

(Aalisarnermut, Piniarnermut Nunalerinermullu Naalakkersuisoq).

Inatsisartunut ilaasortaq Storm Ludvigsen sunngiffimmi piniarnermut allagartalinnut tuttunik umimmannillu pisassiinermi immikkut akiliuteqartitsisoqartalissanersoq pillugu apeqquteqaat aallaavigalugu oqallinnissamik siunnersuummik nassiussinikuvoq.

Siunnersuuteqartup tunngavilersuutaa tassaavoq inuussutissarsiutigalugu piniartut ullutsinni sunngiffimmi piniartartuniit toqqaannartumik unammillerneqarnerat. Sunngiffimmi piniarnermut allagartallit 2011-mi 4.969-iupput inuussutissarsiutigalugulu piniarnermut allagartallit 2.054-iullutik. Sunngiffimmi piniarnermut allagartallit aningaasanik isertitaqareerput akerlianik inuussutissarsiutigalugu piniartunut piniarnermiit aningaasanik isertitaqarnissamut periarfissatuaalluni. Assersuutigalugu inoqutigiinni ataatsini sunngiffimmi piniarnermut allagartallit pingasuuppata tamarmik immikkut tuttunik tallimanik pisaqarsinnaatitaallutik inoqutigiit taakkua tuttunik 15-nik katillugit pisaqarsinnaatitaapput.

Siunnersuuteqartoq isumaqarpoq taamaattoqarneratigut inuussutissarsiutigalugu piniartut aningaasanik isertitaqarsinnaanissaat annikinnerulersoq.

Oqallinnissamik siunnersuuteqarnerminut siunnersuuteqartup tunngavilersuutigaa inuussutissarsiutigalugu piniartuunerup nunatsinni tapersorsorneqarnerulernissaa kiisalu inuussutissarsiutigalugu piniartut nunatsinni nerisassanik pilersuisuunerat pingaarnersaattut inissisimanissaata qulakkeerneqarnissaa.

Aallarniutigalugu Naalakkersuisut apeqqutip pingaaruteqarluinnarneranut isumaqataapput. Minnerunngitsumik inuiaqatigiit kalaallit namminneerlutik nerisassanik pilersorneqarnissaanut atatillugu oqallinnerup nalaani.

Immikkut akiliuteqartitsisoqarnissap pitsaaqutai ajoqutaalu imatut naatsumik allaaserineqarsinnaapput:

Immikkut akiliuteqartitsisoqartalissappat Nunatta Karsianut aningaasanik isertitaqarnissamik kinguneqassaaq kiisalu sunngiffimmi piniartartut ikilinnissaannik kinguneqarsinnaalluni, taamaaliornikkullu inuussutissarsiutigalugu piniartut aningaasanik isertitaqarsinnaanissamut periarfissaqarnerulerlutik. Pisisartut amerlanerusut inuussutissarsiutigalugu piniartut pisaannik tuttup neqaanik umimmaallu neqaanik pisisinnaassammata.

Aappaattut periarfissaavoq piniarnermut allagartap akiata allanngortinnissaa, sunngiffimmi piniarnermik allagartallit inuussutissarsiutigalugu piniartuniit akiliutaat annerulerluni.

Taamaaliornermili aningaasanik iluanaaruteqarfiussanngilaq, taamaasiornermi akileraarusiisoqassamat akiliisitsinerunani. Sunngiffimmi piniartartunut 240 kr.-qarpat, 260 kr.-qarpat imaluunniit 280 kr.-qarpat, taava inuussutissarsiutigalugu piniartumut 100 kr.-qassaaq, 50 kr.-qassaaq imaluunniit akeqassanngilaq.

Qulaani siunnersuutigineqartut periarfissat marluk piviusinngortinneqarnissaannut Piniarneq aallaaniarnerlu pillugit Inatsisartut inatsisaani kiisalu Aningaasaqarnermut inatsimmi tunngavissat suliarineqaaqqaartariaqarput.

Oqaatigineqartorli sunngiffimmi piniarnermut allagartallit tamarmik aalaakkaasumik aningaasanik isertitaqareernerat tamatigoorpallaarpoq. Ilaqarput aamma aningaasanik isertitakitsunik taamaalillutillu namminneq inoqutigiit sunngiffimmi piniarnermik annertuumik iluaqutigisinnaallugu ilaatigullu pissarsiarisinnaasatik pinngitsoorsinnaanagu. Sunngiffimmi piniarneq aamma kulturikkut kingornussaavoq taamaalillunilu immikkut akiliuteqartitsisoqarneratigut akileraaruteqartitsinikkut sunnerneqartussaalluni.

Uani Naalackersuisut inuussutissanik imminut pilersornissaq pillugu politikkiat innersuussutigissavara. Tamannalu eqqarsaatigalugu Naalackersuisut imminut pilersorsinnaaneq pillugu suliniutinik taamaattunik inuussutissarsiutigalugu piniartut sunngiffimmilu piniartartut killilersorneqanninnissaat qulakkeertariaqarpat. Immikkut akiliuteqartitsinerup kingunerisinnaavaa tutut umimmaallu pisarineqartut ikinnerulernerat tamassumalu kingunerisinnaavaa nunaminertani tuttoqarluartuni umimmaqarluartunilu mangiaavallaarnermik.

Tuttut umimmaallu pisarineqartartut kisitsisinngorlugit qiviaraanni sunngiffimmi piniartartunut inuussutissarsiutigalugulu piniartunut qanoq agguataarneqarneri imatut isikkoqarput.

<b>2006-mi tutut pisarineqartut</b>	<b>Pisat amerlassusaat</b>	<b>Piniartumut agguaqatigiissillugit</b>
Sunngiffimmi piniartut 1.472-it	Tuttut 5.582-it	Tuttut sisamat
Inuussutissarsiutigalugu piniartut 799-it	Tuttut 9.553-it	Tuttut aqqaneq-marluk

<b>2009-mi tutut pisarineqartut</b>	<b>Pisat amerlassusaat</b>	<b>Piniartumut agguaqatigiissillugit</b>
Sunngiffimmi piniartut 1.266-it	Tuttut 5.377-it	Tuttut sisamat
Inuussutissarsiutigalugu piniartut 576-it	Tuttut 8.485-it	Tuttut 15-it

<b>2006-mi umimmaat pisarineqartut</b>	<b>Pisat amerlassusaat</b>	<b>Piniartumut agguaqatigiissillugit</b>
Sunngiffimmi piniartut 439-it	Umimmaat 772-it	Umimmaat marluk
Inuussutissarsiutigalugu piniartut 325-it	Umimmaat 1.452-it	Umimmaat sisamat

<b>2009-mi umimmaat pisarineqartut</b>	<b>Pisat amerlassusaat</b>	<b>Piniartumut agguaqatigiissillugit</b>
Sunngiffimmi piniartut 354-it	Umimmaat 627-it	Umimmaat marluk
Inuussutissarsiutigalugu piniartut 322-it	Umimmaat 1.766-it	Umimmaat tallimat

Naalackersuisut isumaqarput tutut umimmaallu pisarineqartartut amerlassusaat takutiinnaraat inuiaqatigiinni piniarsinnaanissamat pisariaqartitsisoqarnera. Naalackersuisut ilimagaat atuisuni neqimik pisinissaannut pisariaqartitsineq allanngorujussuarnavianngitsoq sunngiffimmi piniartut ukiuni qulaani taaneqartuni ikilismagaluartulluunniit.

2010-mut kisitsisit suli piariinngillat kisianni naatsorsuutigineqarpoq ukiuni kingullerniit kisitsisit assigikannissaat.

Aalisarnermut Piniarnermut Nunalerinermullu Naalackersuisoqarfimmi tutunniarnermi umimmanniarnermilu kiisalu pisat allat eqqarsaatigalugit pisanik nalunaaruteqartarnerup pit-

sangorsarnissaa paasititsiniaaneq aqqutigalugu sulissutigineqarpoq kisitsisit tamakkiinerusut pissarsiarinissaat anguniarlugu.

2009-mi kisitsisit qulaani taaneqartut aallaavigigaanni immikkut tamanna assersuutigalugu tuttumut/umimmamut 200 kr., 500 kr. imaluunniit 1.000 kr. akiliuteqartitsisoqarneratigut kingunerissavaa Nunatta Karsianut 1,2 mill. kr.-nik, 3,0 mill. kr.-nik imaluunniit 6,0 mill. kr.-nik isertitsissutaanerani.

Piniarnissamut akuersissutinut atatillugit allaffissornikkut allannguinnikkut akissarsianut aningaasartuutissat ukiumut minnerpaamik 1,0 mill. kr.-iunissaat naatsorsuutigineqarpoq. Taassumalu saniatigut allaffissornikkut aningaasartuutaasussat allat soorlu atortussanut aningaasartuutit.

Taamatut nassuiaateqarlunga matumuuna apeqquteqaat aallaavigalugu oqallinnissamik siunnersuut kingunissalimmik oqallittoqarnissaanik neriuuteqarlunga Inatsisatunut ingerlateq-qippara.